

Azonning fazilati



17:08 / 18.11.2018 18048

Ey, farzand!

Rasululloh sollallohu alayhi vasallam marhamat qiladilar:

«Har bir kishi azon eshitganda shu duoni o'qishi kerak: *«Ashhadu anla ilaha illallohu vahdahu la shariyka lah. Va ashhadu anna muhammadan abduhu va rasuluh. Roziytu billahi robban va bil islami diyman. Va bi muhammadin sallallohu alayhi va sallama rosulan va nabiyya»*.

Bu duo bilan azonni qarshilaganni shirkdan tashqari dengizlar ko'pigicha gunohlari bo'lsa ham Alloh kechiradi». Allohu Akbar! Yana Payg'ambarimiz sollallohu alayhi vasallam shunday deydilar:

«Ey, sevimli sahobalarim! Qiyomatgacha kelguvchi ummatlarim! Azon aytilgach, shu duoni o'qishni unutmang:

«Allohumma Robba hazihid da'vatit taammah. Vas solatil qoimah. Ati muhammadanil vasiylata val faziylah. Vad darajatar rofiyata. Vab'ashu maqomam mahmudanillaziy va'adtah. Varzuqna shafa'atahu yavmal qiyamah. Innaka la tuxliful mi'ad».

Aytilayotgan azonga hurmat ko'rsatib, oxirigacha odob bilan tinglab, boshqa narsalar bilan mashg'ul bo'lmaslik lozim. Agar azondan avval Qur'on yoki namoz o'qish boshlangan bo'lsa, bu ikki ibodat davom ettiriladi.

Hazrati Oisha onamiz azon aytilganda qo'llaridagi ishni qo'yib, azonni tinglardilar. Bir kun ulardan buning sababini so'radilar. U zot shunday javob berdilar:

«Men Rasulullohdan sollallohu alayhi vasallamdan eshitdim. Azon aytilganda uni tinglamasdan boshqa narsalar bilan mashg'ul bo'lish — o'sha kishining iymonida nuqson borligini ifodalaydi», deya marhamat etdilar. Shundan so'ng azon aytilganda hech narsa bilan mashg'ul bo'lmasdan, azonni eshitishni odat qildim».

Buyuk valiylerden Abu Nafs Haddod hazratlari temirchilik bilan shug'ullanganlar. Bolg'a ko'targan qo'llari azon aytilganda ko'tarilgan qolar, azon tugaguncha tushirmasdilar. Agar bolg'a sandon ustida bo'lsa, azon tugaguncha uni ko'tarmasdilar. Suhbatlashayotgan bo'lsalar, darhol to'xtatib, azon tugaguncha jim qolardilar. Bir kun bu muborak zot vafot etdilar. Yo'lda tobutini ko'tarib borishardi, shunda minoradan muazzin azon ayta boshladi. Tobut ko'targanlar bir odim ham yurolmasdan turgan joylarida turib qoldilar. Azon tutaganda yana tobutni ko'tarish uchun kuchlari o'zlariga qaytdi. Azonga bo'lgan hurmatlari, odoblari vafot etgach ham u zotda karomat sifatida ko'rindi.

Payg'ambarimiz sollallohu alayhi vasallam marhamat etadilar:

«Kim azonni eshitgach, muazzin bilan birga sekin ovozda takrorlasa, Alloh aytilgan azonning bir harfiga ming savob beradi va ming gunohini kechadi».

Ey, farzand!

Azon islom dinining muhim ibodatlaridai biridir. Unga nisbatan odob va hurmat saqlash shart.

Ey, farzand!

Islom ilk yoyilgan paytlarda azon yo'q edi.

Ba'zi sahobalar Payg'ambarimizga sollallohu alayhi vasallam: «Yo Rasululloh! sollallohu alayhi vasallam Bizga namoz vaqtlarini bildiradigan bir ishorat bo'lsa, juda o'rinli bo'lardi. Vaqtini tayin etishda bir oz qiynalyapmiz», deyishadi.

O'sha kecha hazrati Bilol Habashiy roziyallohu anhu ikki farishtaning Abu Qubays tepaligiga ko'kdan tushganini tush ko'rdilar. U yerda har ikki farishta tahorat olib, azon va qomat aytgach, biri imom, ikkinchisi iqtido etib namoz o'qidilar. Keyin yana ko'kka uchib ketdilar. Tongda sahobalar Rasululloh sollallohu alayhi vasallam atrofida yig'ilgach, ko'rgan tushni aytdilar. Payg'ambarimiz sollallohu alayhi vasallam farishtalar nima qilib, nima deganlarini so'radilar. Bilol roziyallohu anhu farishtalardan biri ikki qo'lini quloqlariga qo'yib:

«Allahu Akbar! Allahu Akbar!

Allahu Akbar! Allahu Akbar!

Ashhadu anla ilaha illalloh!

Ashhadu anla ilaha illalloh!

Ashhadu anna Muhammadar rasululloh!

Ashhadu anna muhammadar rasululloh!

Hayya alas solah! Hayya alas solah!

Hayya alal falah! Hayya alal falah!

Allahu akbar! Allahu akbar!

La ilaha illalloh!»

deganlarini aytdilar. Umar roziyallohu anhu ham bu kecha xuddi shunday tush ko'rganini so'zladilar. Sahobalardan yana birlari kechasi aynan shu tushni ko'rganini aytdi. Shundan so'ng Payg'ambarimiz sollallohu alayhi vasallam marhamat etdilar:

«O'sha ko'rganlaringiz birodarim Jabroil alayhissalomdir. Sizlarga namoz uchun azon o'qishni o'rgatdilar. Ikkinchilari esa Mikoil alayhissalomdir. U zot imom bo'lib namoz o'qib berdilar».

Allahu Akbar! Subhanalloh! Payg'ambarimizning sollallohu alayhi vasallam sahobalarning, Bilolning ruhi poklari shod bo'lsin! Bugun ham ma'naviy-moddiy olamlar uzra osmoniy kengliklarda azonlar yangrab turibdi!

Valhamdulillahillobbi alamiyn!